

que ie n'en n'aurois permis en d'autres temps, et cela pour leur faire aualer plus doucement la pillule apres quelques ordres portez, i'alloy sans faire semblant de rien dans les Cabanes de ceux qui estoient les plus accoutumez à boire, ie disois parlant à chacun en particulier, mon enfant, iamais tu ne t'en n'empescheras sa il faut que ie te pille saintement par auance, pour payer ceux qui uiendront pour te mener en prison quand tu seras yure, puis en riant ie prenois la premiere chose que ie trouuois proche de luy, que ie luy rendois un moment apres. cela le faisoit rire, mais l'obligeoit aussy de m'asseurer qu'il ne s'ennyureroit plus. d'autres au retour de leurs chasses apportans assez de pelleterie, ie leur disois en riant, ie me resiouis, uoila de quoy paye ceux qui uiendront te prendre quand tu seras yure car tu ne manqueras pas de t'enyurer, tu le moyen de s'en abstenir ayant tant de quoy boire? et neantmoins tu scais les ordres sur le st pillage contre les yurogues, puis parlant un peu plus serieusement. Je luy disois, ça mon fils, ne vault il pas mieux que tu achepte de ta chasse de bonnes couertes pour ta femme pour tes enfans pour tes parens qui sont en necessité, que de uoir consommer cela partie a boire partie a de malheureux frais pour payer aux qui t'emprisonneront, et pour te retirer de la prison, le grand Capitaine n'a il pas une ste compassion de toy, en te defendant de t'ennyurer, afin que tu n'employe ta chasse qu'a te procurer à toy et à ta famille des uiures. il ne regarde que ton bien en cela, en retire-il quelque profit. Ils me disoient tous tu as raison, il fait bien de nous deffendre de nous ennyurer, et plusieurs m'ont aiouté, il y a long temps